

Nos morts



Placi Soliva - Gartmann

Rueras

04.05.1932 - 19.10.2001

Il tuchiez giud clutger-baselgia fa impressiun, mo anunzia il clom dil Segner per assister alla s. messa ni per urar da cuminanza. Il zenn grond, persuls ha el in tun pli profund e magari lamentond. Ils 19 d'october ha el annunziau als parochians da Tujetsch la mort da nies convischin Placi Soliva-Gartmann da Rueras. Per nus vivents empau baul, mo il carstgaun propona e Dieus dispona. Da quella verdad negin che sa fugir.

Nus tuts essan mortals e baul ni tard tucc'ei ad in e scadin da bandunar il terrester. Negin sa nua e co.

Placi Soliva ei naschius a Sedrun ils 4 da matg 1932 sco emprem affon dils conjugals Placi e Catrina Soliva - nata Cavegn. En in cauld ed emperneivel ambient ha Placi passentau ensemes cun duas soras ed in frar ina biala affonza. Ses cars geniturs han buca schau per breigia da dar a tuts ina buna educaziun che detti bien tegn per la veta futura. Bab e mumma fuvan ils ustiers dil restaurant muntagnard « Alp-su » sil pass Alpsu. Suenter ver frequentau las scolas da vischerna (dus onns a Schluein) serenda il giuven Placi a Rapperswil en emprendissadi da cuschinier e quei tier in hotelier tujetschin, il schinumnau Lucas Berther dalla Cruna. Ils geniturs Placi e Catrina havevan in tec quet e schevan, forsa dat quei il niev ustier sill'Alpsu. E veramein quei ei severificau pli tard. Suenter gl'emprendissadi seperfecziunescha Placi en differents hotels en Svizra. Duront quels onns fa el enconuschiantscha cun la giuvna Anna Gartmann da Castrisch, oriunda da Surin, Val Lumnezia. Gi'onn 1956 ein els maridai. La lètg vegn benedida cun dus taffers buobs che portan bia legria mo era bia lavur en casa. Oz ein omisdus en bialas posiziuns e damognan stupent la veta quotidiana.

1963 cumpran Placi e sia consorta l'ustria Alpsu ch'era en possess da ses geniturs. Cun endinada lavur e sustegn da sia cara Anna e persunal han els fatg flurir quella fatschenta tochen 1987. Ils conjugals ein buca stai culs mauns a calun. L'ustria vegn renovada ed era a Rueras laian els baghegiar casa nova per las vacanzas e serasontga. Mahoias lavur e quitaus. Lur hospis vegnevan pupergnai da camifo ord cuschina e tschaler. Il caracter da Placi era magari sensibels. El pretendeva bia da sesez, mo era da ses conlurvrs. En siu intern avdava denton in cor plein buontad che havess dau

ora tut sch'ins capeva siu cunfar. 1987 venda Placi l'ustria allas pendicularas Sedrun-Rueras SA. Duront las vacanzas ed in per onns en pensiun era siu hobby far viadis lontans e damaneivels en tiaras jastras. Secapescha en cumpignia cun sia cara dunna. Da quels raquintava el fetg bugen.

Dapi 1991 ha ina maligna malsogna entschiet a sgurdinar vid sias forzas. Tut agid medicinal ed apparats da levgera ein stai vans. Il flad leva buca pli. Ina disgida dil cor e Placi ei sedurmentaus ruasseivlamein e senza pli grondas pitgiras ils 19-10-2001 a Rueras.

Car Placi,Ti has ussa finiu il cumbat terrester e tes mals ein svani. Alla buna consorta Anna e fegls cun famiglias e tuts parents sincera condolentscha. Vegli il Tutpussent dar forza e curascha da supportar la greva crusch. Las restonzas terrestras rauassan ussa sut s. Vigeli e nus schein encrescher, mo mantenin Tei en buna memoria. Mo Ti gauda ussa en pasch la beedadad celestiala. Per tut il bien cordial Dieus paghi.

Ruaussa en paisch.

Pally Vinzens